

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- सुरक्षाबलें अनंतनाग जिले थमां लापता इक जुआन दा गोलिएं कन्नै छलनी शव बरामद कीता। लैफिटनेंट गवर्नर मनोज सिन्हा होरें शहीद जुआन गी श्रद्धांजलि अर्पित कीती ऐ।
- उपराज्यपाल मनोज सिन्हा होरें आखेआ ऐ जे जम्मू कश्मीर च रमानदारी कन्नै असेंबली चुनाएं दा होना ते इंदे च लोकें दी बड़ी भारी शमूलियत इक जीवंत लोकतंत्र दा प्रमाण ऐ।
- बीजेपी दे महासचिव अशोक कौल होरें आखेआ ऐ जे उंदी पार्टी जम्मू कश्मीर दी नमीं सरकार च इक मजबूत विपक्ष दी भूमका नभाग। नैशनल कांफ्रेंस अज्ज सरकार दे गठन गी लेइयै कांग्रेस कन्नै गल्लबात करोग।
- मन्ने परमन्ने दे भारती उद्योगपति ते परोपकारी रतन टाटा हुंदा कल रातीं 86एं ब'रें दी उमरी च काल होई गोआ ऐ।

<><><><><><>

Soldier Body Recovered

सुरक्षाबलें घाटी दे अनंतनाग जिले थमां लापता इक जोआन दा गोलियें कन्नै छलनी शव कल बरामद कीता ऐ। हासल जानकारी मुजब टेरीटोरियल आर्मी दा जवान हिलाल अहमद भट्ट जेहड़ा कल्लै थमां लापता हा, दा शव अज्ज अनंतनाग दे उत्तरासू इलाके च संगलान आले जंगलें थमां बरामद कीता गोआ ऐ। अधिकारी नै दस्सेआ जे 2 जुआनें गी आतंकवादिएं इक अभियान दरान अगुवाह करी लैता। इक सैनिक नस्सने च कामयाब होई गोआ हा। उपराज्यपाल मनोज सिन्हा होरें सैनिक गी श्रद्धांजलि भेंट कीती ते उंदे पार्थिव शरीर पर पुष्प चक्र भेंट कीता।

<><><><><><>

LG-Sinha

उपराज्यपाल मनोज सिन्हा होरें जम्मू कश्मीर च सफलतापूर्वक विधानसभा चुनां सम्पन्न होने पर खुशी जाहर कीती। उनें आखेआ जे लोकें दी शमूलियत नै लोकतंत्र च उंदी आस्था ते विश्वास गी दर्शाया ऐ। उनें आखेआ जे खरे प्रशासन दे सिद्धांत, समाजी प्यांह ते सौहार्द जम्मू कश्मीर गी प्रगति आली भेठा लेई जा'रदे न। उपराज्यपाल होरें नमें चुनाएं दे विधायकें गी शुभकामना दित्तियां। खास करी नैशनल कांफ्रेंस ते ओहदे भ्याल गी। उनें मेद जाहर कीती जे नैशनल कांफ्रेंस ते ओहदे भ्याल लोकें दी सेवा करगंन। उनें आखेआ जे भारतीय संविधान इक लोह आला लेखा ऐ ते असें सारें गी जम्मू कश्मीर दे विकास ते कल्याण लेई किट्ठे रलियै कम्म करना लोडचदा। सिन्हा होरें केन्द्र शासत प्रदेश च लोकतंत्र गी मजबूत करने लेई नागरिकें दा आभार जताया। उनें मुख् चुनां अधिकारी, चुनावी अमले। जम्मू कश्मीर पुलस ते सुरक्षा बलें आस्सेआ चुनां प्रक्रिया गी आजाद, निरपक्ख ते पारदर्शी ढंगै सिर करोआने लेई उंदी सराहना कीती।

<><><><><><>

BJP General Secretary

भारतीय जनता पार्टी दे वरिष्ठ नेता ते महासचिव अशोक कौल होरें आखेआ जे उंदी पार्टी जम्मू कश्मीर च इक मजबूत विपक्ष दी भूमका नभाग। उनें आखेआ जे पार्टी लोक आस्सेआ दित्ते गेदे जनादेश गी स्वीकार करदी ऐ ते ओह इक मजबूत विपक्ष दे तौर पर भूमका नभाग। पार्टी लोकें लेई खास करी जम्मू खित्ते दे लोकें लेई जिनें बीजेपी गी वोट दित्ता ऐ कम्म करोग।

<><><><><><>

National Conference

नैशनल कांफ्रेंस दे विधायक दल दी बैठक लगोग ते इस दरान सरकार दे गठन बारे चर्चा कीती जाग। नैशनल कांफ्रेंस नै पैहले गै गठबंधन करी लैता हा। इस सरबंधै च सारे विधायकें गी जानकारी दित्ती गई ऐ। जेहड़े बी आजाद मेदवार पार्टी च शामिल होआ'रदे न, ओह बी बैठक च मजूद रौंहगन। बैठक दपैहरी मगरा होग ते एहदे च विधायक दल दा नेता चुनेआ जाग। इस दरान घट्टोघट्ट सांझा कार्यक्रम पर बी चर्चा होग। मगरा नैशनल कांफ्रेंस ते कांग्रेस भ्याल सांझे नेता दी ताल करगंन जेहड़ा अगला मुख्मंत्री होग।

<><><><><><>

Dr. Karan Singh

जम्मू कश्मीर च इक दहाके दे वक्फे मगरा आजाद ते निरपक्ख ढंगै सिर चुनां होने पर संदोख जाहर करदे होई साबका सांसद ते वरिष्ठ नेता डॉ. करण सिंह होरें चुनां आयोग ते सुरक्षा बलें दी सराहना कीती। डॉ. करण सिंह होरें आखेआ जे नमीं सरकार आस्तै सब्बने थमां बड्डी चुनौती ऐ। दौनें खित्तें च जेह्डी सियासी वित्थ ऐ, उसी पूरना। डॉ. करण सिंह होरें उमर अब्दुल्ला होरें गी मुबारकबाद दित्ती जेह्डे सरकार बनाने आले न। उनें उमर हुंदे सफल कार्यकाल लेई शुभकामना बी दित्तियां। उनें आखेआ जे अगली चीज ऐ जम्मू ते कश्मीर दा राज्य दा दर्जा वापस करना जिसी केन्द्र सरकार नै सुप्रीम कोर्ट च मन्नेआ हा। उनें आखेआ जे इसगी होर चिर लाए बगैर वापस कीता जाना लोडचदा।

<><><><><><><>

JMC

जम्मू नगर निगम दे कमिशनर डॉक्टर देवांश यादव होरें कल न्यू प्लाट, टाली मोड़, जानीपुर, रूप नगर, मुट्टी ते कन्नै लगदे होरनें इलाकें दा दौरा लाइयै उत्थे तोढ चाढी जा'रदी बक्ख-बक्ख गतिविधिएं दा जायजा लैता। साफ-सफाई मतल्लक कम्में दा निरीक्षण करदे होई कमिशनर हारें अलॉट कीते गेदे वार्डे च नियमित तौर पर साफ-सफाई दे निर्देश दित्ते। उनें सरबंधत अधिकारिएं गी आखेआ जे ओह लोकें गी उंदे वार्डे च कूड़ा कचरा किट्टा करने लेई कम्मै पर लाई गेदी गड्डिएं दा लाह ठोआने बारै जागरूक बनान। उनें आखेआ जे अपने शैहरा गी साफ-सुथरा रक्खना हर नागरिक दी जिम्मेदारी ऐ।

<><><><><><><>

Ratan Tata

दुनिया दे मन्ने परमन्ने दे भारतीय उद्योगपति ते परोपकारी रतन टाटा हुंदा कल रातीं मुंबई च काल होई गेआ। ओह 86 ब'रें दे हे ते उंदा इक प्राइवेट अस्पताल च इलाज चलै करदा हा। टाटा संस ग्रुप दे अध्यक्ष एन.चन्द्रशेखरन होरें इक ब्यान जारी करियै रतन टाटा हुंदे पूरे होई जाने दी तस्दीक कीती ऐ। उनें आखेआ जे उत्कृष्टता, निष्ठा, नमिएं काह्डें ते नवाचार गी लेइयै इक जबरदस्त धेइयै कन्नै रतन टाटा हुंदे नेतृत्व च टाटा समूह नै दुनियाभरै च अपनी मजूदगी ते विस्तार कीता ते सडा अपने नैतिक दायरे लेई निष्ठावान रेह। उंदे परोआरदे सदस्यें दा आखना ऐ जे उंदी सादगी, स्वभाव च नीमापन, दया भावना ते लक्ष्य बक्खी पूरी निष्ठा ते तनदेही कन्नै कम्म करने दी भावना औने आलिएं पीढिएं गी प्रेरत करदी रौहग। महाराष्ट्र सरकार नै घोषणा कीती ऐ जे उंदी खीरी संस्कार पूरे सरकारी सम्मान कन्नै कीता जाग। रतन टाटा, टाटा संस दे चेयरमैन, एमेरिट्स ते टाटा ट्रस्ट दे चेयरमैन हे।

भारत दे सब्बने शा बड्डे ते सम्मानित कारोबारिएं चा इक रतन टाटा नै दळं दहाकें कोला बी मते समें तगर टाटा संस दे अध्यक्ष दे रूपै च कम्म कीता। टाटा ट्रस्ट दे राएं ओह समाजी भलाई बेहतरी दे केई कम्मं च लग्गे दे हे। राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेन्द्र मोदी होरें रमन टाटा हुंदा काल होई जाने पर दुख जताया ऐ।

<><><><><><>

ASEAN Summits Kick Off

44मां ते 45मां आसियान शिखर सम्मेलन कल्लै थमां लाओस दे वियेनदीयाने शैहरे च शुरू होई गे न। शुरूआती समारोह गी संबोधत करदे होई लाओस दे राष्ट्रपति थांमलाओस सिसोलिथ होरें आसियान मुखें दा आह्वान कीता जे ओह रमानदारी, स्थिरता ते लगातार विकास दे सांझे लक्ष्यें दी दिशा च कम्म करदे रौहन। उनें आखेआ जे आसियान मुखें गी बरोबरी ते आपसी फायदें पर आधारित बहु-राष्ट्रीयता दे प्रति वचनबद्धता दा लगातार सम्मान करना लोड्चदा ऐ। प्रधानमंत्री नरेन्द्र मोदी होर लाओस दे दळं दिनें दे दौरे पर रवाना होई गेदे न। मोदी होर आसियान मुखें दे होरने राष्ट्र अध्यक्षें दे कन्नै भारत ते आसियान बश्कार सरबंधें दी प्रगति दी समीक्षा करगंन ते आपसी सरबंधें दी भविक्ख दी दिशा बी तैह करगंन।

<><><><><><>

Kathua Agriculture

कठुआ दा राई-बाई विभाग करसानें दी औंदन गी दूना करने गितै मौसमी रूतै बिजन बी खुम्बें दी खेती गी बढावा देआ करदा ऐ। एहदे लेई मते शा मते करसानें गी आकर्षित करने ते सिखलाई देने गितै विभाग नै जिला केंद्र खडेरें न। कठुआ दे मुख कृषि अधिकारी संजीव राय होरें इस बारै आकाशवाणी कन्नै खास गल्लबात करदे होई आखेआ.....

<><><><><><>

DIC Ramban

रामबन दे डिप्टी कमीशनर बसीर उल हक चौधरी हुंदी हिदायतें मूजब जिला उद्योगी केन्द्र रामबन नै बओत दे बलाक विकास दफ्तरै च इक जागरूकता शिविर दा सरिस्ता कीता। एहदा मकसद उद्योग ते बपार मैहकमे ते डीआईसी रामबन दी बक्ख-बक्ख स्कीमें दी अमलावरी बारे जागरूकता पैदा करना हा। इस दरान पीएमईजीपी बारे जानकारी बी उपलब्ध करोआई गई।

सरबंधत अधिकारी आस्सेआ दरखास्त देने दी प्रक्रिया ते डीआईसी कन्ने पंजीकृत होने दे लाह बारे बी दस्सेआ गेआ तां जे युवा एहदे थमां लाह ठोआई सकन।

<><><><><><>

World Mental Health Day

अज्ज विश्व मानसिक सेहत दिवस मनाया जा'रदा ऐ। एह दिन मानसिक सेहत सरबंधी मुद्दे बारे जागरूकता फैलाने ते दुनिया भरै च मानसिक सेहत कन्ने जुड़ी दिएं सेवाएं गी बढ़ावा देने दे जतने गी मजबूत करने आस्तै मनाया जंदा ऐ। इस ब8रे इस ध्याड़े दा विशे सार ऐ कम्मकाज आली थाहर पर मानसिक सेहत। इस बारे दे विशे व कम्मकात आली थाहरें पर मानसिक सेहत प्रति जागरूकता फैलाने, एहदे कन्ने जुड़े दे खतरे कन्ने निबड़ने ते जरूरतमंदें गी मदद देने जनेह उपाएं दी दिशा च कम्मं दे महत्व पर लोह पाई गई ऐ।

<><><><><><>

Cricket

कल रातीं क्रिकेट च शानदार प्रदर्शन करदे होई भारतीय महिला ते पुरुष दौनें टीमें अपने अपने टी-20 अंतर्राष्ट्रीय मकाबले च जबरदस्त जित्त दर्ज कीती। दुबई च खेड़डे जा-रदे आईसीसी महिला टी-20 क्रिकेट विश्व कप दे ग्रुप-ए दे मकाबले च भारतीय टीम नै श्रीलंका गी 82 रंज कन्ने हराई दित्ता। पैहले बल्लेबाजी करदे होई भारत नै 20एं ओवरें च 172 रंज बनाए जेहदे परते च श्रीलंका दी पूरी टीम 19 ओवर ते 5 गेंदें च 90 रंज बनपाइयै आउट होई गई। तोआई मर्दे दी भारतीय क्रिकेट टीम नै बंगलादेश कन्ने 3 टी-20 मैचें दी श्रृंखला दे दुए मैच च कल नमीं दिल्ली च महमान टीम गी 86 रंज कन्ने हराइयै श्रृंखला अपने नां करी लैती। भारत नै पैहले बल्लेबाजी करदे होई 20एं ओवरें च 221 रंज बनाए जेहदे परते च बंगलादेश दी टीम 0 विकटें दे नुक्सान पर 135 रंज गै बनाई सकी।

<><><><><><>